

樂

府

廣

序

樂府廣序目次 卷之二十三

漢頌二

廟祀樂章

安世房中歌 十六章

大孝備矣

七始華始

我定歷數

王侯秉德

海內有姦

大海蕩蕩

安其所

豐艸萋

雷震震

都荔遂芳

馮馮翼翼

磴磴

嘉薦芳矣

皇皇鴻明

孔容之嘗

承帝明德

樂府廣序目次

卷之二十三終

樂府廣序

卷之二十三

浙西止谿圃人朱嘉徵論正

漢頌二

廟祀樂章

安世房中歌

十六章

通典。周有房中之樂。歌后妃之德。秦始皇二十六年。改曰壽人。漢書禮樂志。漢房中祠樂。高祖唐山夫人所作。孝惠二年。使樂府令夏侯寬備其簫管。更名安世樂。

謹按。漢初宗廟之制。備別祀于宮中。如家人禮。漢禮樂志。稱房中祠樂。非燕樂之辭。漢書房中歌十七章。止次九章。郭氏樂府。馮氏詩紀。同爲十六章。今從詩紀改定。句數互異。各分注本曲之後。

大孝備矣。休德昭清。高張四縣。樂充宮庭。芬樹羽林。雲景杳冥。金支秀華。庶旒翠旌。

樂府廣序

卷五

漢頌

廟祀樂章

一

漢書大孝備矣。章八句。樂府并七始華始四句爲一章。章十二句。今並遵詩紀。

集考。縣古懸字。樂四縣。天子宮縣。謂設宮縣而高張之。下言所樹羽葆也。金支。樂上衆飾有流翬羽葆以黃金爲支。其首敷散析五采羽。注翠旄之首以爲旌。

序曰。大孝。頌假廟之本也。聖王以德孝祇承於帝。故大也。天子之孝通神明光四海。漢祖思以孝治天下。列宗之號皆以孝命。一代述作。竟成婦人之手。漢廷亦多才哉。大孝備矣。義冠十六章。是綿綿瓜瓞起法。休德昭清。義冠下章。首舞以明功。次歌以詠德。武德舞者。高帝樂著成功之始也。

七始華始。肅倡和聲。神來宴娛。庶幾是聽。弼弼音迭。細齊人情。忽乘青玄。熙事備成。清思聊聊。經緯冥冥。

漢書七始章十句樂府嘯嘯音送章章六句 齊漢書作齋

集考娛嬉同戲也。玄天也。言以樂送神。福祿之事。儻成也。

尚書大傳曰。七始者。黃鐘之外。七音皆可旋爲宮始也。蔡元定曰。宮與商。商與角。徵與羽。相去皆一律。角與徵。羽與宮。相去獨二律。一律則近而和。二律則遠而不相及。故宮羽之間有變宮。角徵之間有變徵。此亦出于自然。左氏所謂七音。前漢志所謂七始。是也。然五聲者。正聲。故以起調。畢曲爲諸聲之綱。至二變聲。不比于正音。但可以濟五聲之所不及而已。然有五聲而無二變。亦不可以成樂也。楊慎曰。古文尚書七始。詠予疑今之切韻。宮商角徵羽之外。又有半宮半徵。蓋喉齒牙舌唇之外。有淡喉。淡喉二音。此謂七始。詠卽韻也。

序曰。七始歌也。傳曰。歌以發德。上承武德之舞。繼辭也。王者功成作樂。咸本其功德所著。開業以武守。成以文。七始。備肅雝二義焉。肅者動人心。雝者娛神。

貺清思經緯皆言聲也未及事績

我定歷數人告其心敕身齊戒施教申申乃立祖廟敬明尊親大矣孝熙四極爰轅

漢書我定歷數至樂民人爲章章三十七句樂府章八句集考齊讀齋嶠臻同

序曰我定王者首立廟定治也漢王五年與楚相拒策陽命關中立漢宗廟社稷世祖初立宗廟於雒陽未幾鄧公入長安承制謁高廟收神主詣雒示天下知所歸矣白虎通云祭之有主孝子所繫心也況爲四海臣民所繫心者乎

王侯秉德其隣翼翼顯明昭式清明嘔矣皇帝孝德竟

全大功撫安四極

樂府王侯秉德章章七句
集考爾雅東至于泰遠西至于邠國南至于濮陽北
至于祝栗謂之四極

序曰王侯助祭也王者告成功於廟群侯牧伯咸在
式序在位而訓之式法也興王之與名世德寓於法
如蕭相定律叔孫制禮皆具會朝清明氣象

海內有姦紛亂東北詔撫成師武臣承德行樂交逆簫
勺群慝肅爲濟哉蓋定燕國

樂府海內章章八句

序曰海內師行而告廟也一時武臣仰德無復寇亂
焉燕國顏師古謂單于非也按平城之役已定和

親時韓王信燕王綰及陳豨相繼亂於燕晉之墟並在東北此歌蓋作於初平盧綰時耶周頌時邁薄言震之載囊弓矢頗具此懷柔之略

大海蕩蕩水所歸高賢愉愉民所懷大山崔嵬百卉殖民何貴貴有德

樂府大海蕩蕩章章六句

漢書大海蕩蕩高賢愉愉

愉爲句讀按七言爲正鍾惺曰諷之修文用賢有卷阿馮翼孝德之思大風歌朝氣銷半

序曰大海頌王業之本也主者以安民爲務以庸賢爲德本紀稱高祖仁而愛人喜施意豁如也廣大便覺尊高爲物所待命於下流矣

安其所樂終產樂終產世繼緒飛龍秋游上天高賢愉

樂民人。

樂府安其所章章八句
集考秋飛貌楊雄賦秋秋踰踰入西園莊子亦有秋
駕之法言駕馬騰驤秋秋然也

序曰安其所成民也聖王先成民爲壽世之本而任
賢又爲成民之本故曰治本約世曼壽昊天有成
命曰肆其靖之鄭箋謂其行寬仁安靜之政以定天
下焉寬仁所以止苛刻也安靜所以息暴亂也太史
公數稱沛公長者能寬容且以清靜繼治民以寧一
天下有不歸心於漢者乎然安民之本在於任賢猶
夫上天者之有待於飛龍承上章作永歎法師古注
高賢指人君有德者言殊誤

豐草萋女羅施善何如誰能回大莫大成教德長莫長
被無極

漢書豐草萋章章八句樂府同
應劭曰女羅延于松栢之上異類而猶載之况同姓
乎。

序曰豐草復古封建之制慎始也豐草其本而榮喻
同姓之侯惟草茂而蘿得施之善立而衆莫違之與
湛露異辭夫漢懲秦之孤立不得不復封建則必豫
教而安全之當時非劉氏不王已著爲令而支庶半
天下褒大封或至七十餘城其後不能無變蓋先賈
傅之疏而陳之矣後漢明帝深慮及此使功臣子孫
莫不受經而四姓小侯並與焉明德馬后亦同此意

雷震震電耀耀明德鄉治本約治本約澤弘太加被寵
咸相保德施太世曼壽

漢書雷震震章章十句樂府同
集考鄉方也言王者之威取象雷電明示德義之方
而治政本之約約讀要曼延也

序曰雷震震治天下者務審所尚也諸葛武侯言治
天下以大德不以小惠吾今威之以法法行則知恩
限之以爵爵加則知榮可謂明德所嚮其本也約而
澤施博矣

都荔遂芳窈窕桂華孝奏天儀若日月光乘玄四龍回
馳北行羽旄殷盛芬哉芒芒孝道隨世我署文章

漢書桂華章章十句樂府同
集考晉灼注桂華殿名瓊云茂陵中書歌都嫺桂英

美芳鼓行不得爲殿。師古曰。都良薛荔俱有芬芳。桂華之形。盲然也。皆謂神宮所有耳。孝奏以下。言以孝道進承于天。天神降下。因茲廣遠。魏署分部也。

序曰。桂華美芳二曲。言大孝格天也。以衆芳之達於神宮。興孝道之達於上下也。芬哉。芄芄句。承上起下。語。王者創業垂統。總爲孝之文章。東坡嘗言。天子惟以齋祭禮樂爲政事。能守此。則天下服矣。兩漢不忘本事。隨世建號。而始皇侈心。予雄世。以一二數。期於傳之無窮。豈不謬哉。

馮馮翼翼承天之則。吾易久遠。燭明四極。慈惠所愛。美若休德。杳杳冥冥。克綽永福。

漢書美芳章至終無兵革爲一章。章十六句。篇首有桂華二字。樂府至師樂山則爲一章。章十句。今從詩。

紀

劉奉世曰。桂華美芳。皆二詩章名。本側注在前篇之末。傳寫之誤。遂以冠後。後詞無美芳。亦當作美若矣。集考。易。疆場。言疆場遠大也。若。順。綽。緩也。馮馮。塘堅聲。

序曰。美芳。王者奉天出治。明有法也。天間馮翼。惟像。何以識之。馮翼者。氤氲浮動之氣也。像不可識。而剛柔迭運之則可識耳。王者承天之則。修之冥冥。運之昭昭。以爲無象。莫燭明於此。以爲有象。莫杳冥於此。此周頌以文之不顯。合天之於穆者。是豈以負重器。行遠途爲慮哉。

磴磴卽卽。師象山則。嗚呼。孝哉。案撫戎國。蠻。竭歡。象來致福。兼臨是愛。終無兵革。

樂府廣序

卷三 漢頌

廟祀樂章

六

漢書禮禮卽卽篇上有美芳二字 樂府嗚呼孝哉
章章六句

集考。禮禮崇積也。卽卽充實也。師衆也。則法也。積實之盛。衆類于山。象譯也。蠻口遣譯致福貢也。

序曰。禮禮法古也。書云。稽於先王。成憲廼永無愆。承天之則。更制也。師象山則繇舊也。此章以饒並著後王之法。漢土地廣遠。上章已見。人民之衆。蓄積之富。略著於此。明乎外治之盛。繇於內治舉也。天保采薇不是二事。

嘉薦芳矣。告靈饗矣。告靈旣饗。德音孔臧。惟德之臧。建侯之謦。承保天休。令問不忒。

漢書嘉薦芳矣。章章八句。樂府同。集考。饗合韻音鄉。孔甚也。臧善也。

序曰。嘉薦侑神之辭也。助祭諸侯咸在。故頌祖考之

德以勉之。豐草爲同姓之侯。頌嘉。嘉爲異姓之侯。頌也。以功臣子侯。如周子南君。或助祭飲酎。節承王事。咸使聞之。兼顯相有客二頌之義焉。後坐少府省金失侯者衆。則承保天休。令問不忘。勉之爲已至矣。

皇皇鴻明。蕩侯休德。嘉承天和。伊樂厥福。在樂不荒。惟民之則。浚則師德。下民咸殖。令問在舊。孔容翼翼。

漢書皇皇鴻明至受福無疆爲一章章二十六句樂府章十句樂苑章六句浚則師德章章四句餘與詩紀同

焦考。侯。惟也。天下蕩平。惟帝之休德。伊是也。浚。深也。則。法。師。衆。舊。久也。言浚法衆德。故能生育群黎。久有善名。其容甚敬也。

序曰。皇皇孔容二章。勉後王敬承天休也。敬爲王者之德。余按宋淳祐中鄭清之疏。敬天之怒。易敬天

之休難。蓋憂則懼心生。懼則怒可轉而爲休。喜則玩心生。玩則休或轉而爲怒。詩曰。嘉承天和。在樂不荒。此之謂也。語云。人匪水鑑。惟民是鑑。夫耕當問農。織當問婢。王者善於用衆之道哉。詩曰。浚則師德。孔容翼翼。此之謂也。民兼臣庶言容德容也。從令問來。充然得禮之意。誦下承容之嘗。又爲後王所則矣。孔容之嘗。承帝之明。下民之樂。子孫保光承順溫良。受帝之光。嘉薦令芳。壽考不忘。

樂府孔容之嘗。章章八句。集考帝謂天也。下同。保光。永保其光寵也。

序曰。孔容有嘗敬也。所以事天而儀其志。夫祖有功。宗有德。卽帝之明也。民之變也。子若孫之世法而世。

則也。故嘉薦以時。嘗見其濟濟然。漆漆然。所謂惟孝子爲能享親者。卽儀志之實事。

承帝明德。師象山則雲施稱民。永受厥福。承容之嘗承帝之明。下民安樂。受福無疆。

樂府承帝明德章章八句
集考衆象山而爲法言不塞不崩也。稱尺孕反言稱物平施其澤如雲也。

序曰。承帝祝釐申重之辭也。王者格於皇天。上二章頌之矣。而辭之重。言之複。示大福不可以倖致焉。

上帝之明。蓋上帝之德也。王者承之。是謂福極。復申以師象山。則雲施稱民之辭。何歟。古來受命之君。懼其自用而不信法。守文之后。又懼其任法而不法。法

故馮翼章承天之則爲首出者言也。孔容章承帝之明爲繼世者言也。蓋用明之道尤貴用衆不當獨智自高耳。余按此章通繳十五章之義承帝明德申言顯明昭式也。師象山則申言承天之則也。雲施稱民申言敬明尊親兼臨是愛也。結大孝備矣一案。若夫守文令主承容之嘗所謂承保天休令問不忘也。承帝之明所謂在樂不荒浚則師德也。結孝道隨世一案。總閱十六章篇法相承從大雅文王下武章來其辭大以雍可列諸正大雅所謂房中樂類楚聲者不過如桂華美芳一二闕耳。十九章爲一代文學之作顧此亦當氣奪。

樂府廣序目次 卷之二十四

魏頌 一

郊廟樂章

太廟頌 三章

樂府廣序 目次 卷之二十四終

樂府廣序

卷之二十四

浙西止谿圃人朱嘉徵論正

魏頌

郊廟樂章

魏志明帝景初元年十月營維陽南委粟爲圜丘詔曰曹氏繫世出自有虞氏今祀圜丘以始祖帝舜配號圜丘曰皇皇天帝方丘所祭曰皇皇后地以舜妃伊氏配天郊所祭曰皇天之神以太祖武皇帝配地郊所祭曰皇地之祇以武宣后配宗祀皇考高祖文皇帝于明堂以配上帝初侍中高堂隆論郊祀事以魏爲舜後推舜配天其後蔣濟著文以追諡隆謂舜本姓媯其後曰田曹氏族出自邾魏武作家傳自云曹叔振鐸之後又陳思王作武帝誄曰於穆武王冒稷胤周則非舜後明甚而橫祀非族降黜太祖不配正天皆爲繆妄自正始以後終魏代不復郊祀馬氏通考康成謂配天者周祀天于圜丘以嚳配謂之禘祀五帝于郊以稷配謂之郊又祀五帝及五人

帝于明堂以文王配謂之祖祀五神于明堂以武王配謂之宗此三祭者必皆有祖考可配而後可以舉事魏文帝時有郊祀而未有祖配明帝時復遠取舜以配圜丘然後以武帝配郊以文帝配明堂

景初元年六月羣臣奏定七廟之制曰武皇帝肇造洪業爲魏太祖文帝繼天革命爲魏高祖上集成大帝命室爲魏烈祖于太祖廟北爲二祧其左爲文帝廟號曰高祖昭祧其右擬明帝號曰烈祖穆祧二祖之廟萬世不毀其餘四廟親盡迭遷一如周后稷文武廟祧之禮

侍中繆襲議周存六代之樂故各有所用今樂制既亡唯承漢氏部武魏承舜又周爲二王之統故文始大武武德武始太鈞可以備四代之樂奏黃鐘舞文始以禮天地奏太簇舞大武以祀五郊明堂奏姑洗舞武德巡侍以祭四望山川奏蕤賓舞武始太鈞以祭宗廟及二至祀丘澤于祭可兼舞四代又漢有雲翹育命之舞舊以祭天今可兼以雲翹祀圜丘兼以育命祀方澤祀天地宜宮懸如延年議司空衛臻議圜丘宜用大韶樂宜宮懸宗廟之樂宜用武始咸熙宋書樂志太祖武皇帝樂宜曰武始之樂武神武也武又跡也言神武之始王跡所起也高祖文皇帝樂宜曰咸熙之樂咸皆也熙興也應受命之運天下由

之皆興也。夫歌以詠德，舞以象事。于文、武爲賦、兼秉文武聖德，所以章明也。制樂舞，名章賦之舞。

太廟頌 三章

建安十八年，曹操爲魏公，加九錫，始立宗廟，令祭作此頌以享其先。始名曰顯廟，頌後人更今名。

思皇烈祖，時邁其德。肇啓洪源，貽燕我則。我休厥成，聿先厥道。丕顯丕欽，允時祖考。

右曲二韻八句

集考：聿，通同。述也。言嘉後人之有成。縣能述先祖之道，不欽謂後人大敬承之。

綏庶邦和，四宇九功。備燹樂序，建崇牙。設璧羽，六佾奏八音。舉昭大孝，衍妣祖。念武功，收純祐。

右曲一韻十二句

集考：禮記：殷之崇牙，懸樂器之筍簋也。周之璧琫，執以舞也。左傳：諸侯六佾，衍樂也。念，不忘。收，受也。

於穆清廟翼翼休徵。祁祁髦士。厥德允升。懷想成位。咸
韓在宮。無思不若。允觀厥崇。

右曲二韻八句

樂府關詩紀載王粲本集左本漢

魏郊祀歌並闕

集考。敬以奉祀。斯名嘉祥。祁祁衆也。髦士。相祀之臣。與周頌濟濟多士。秉文之德。同義。卒言四方無有弗順。則功業信崇也。

序曰。太廟頌三章。魏公開國時樂章也。恭敬安和。如不欲煩。最爲得體。惜仲宣早折。黃初中。不復與子建更造。存一代典制。亦千古遺憾。然子建以鼙鼓曲當之。安有大巫之歎。郭氏獨逸此曲。未詳其義。如左。克明古樂府。全闕郊廟樂章。有風雅而無頌。豈稱四始哉。

樂府廣序目次

卷之二十五

漢一

歌詩上

高帝

大風歌

鴻鵠歌

武帝

瓠子歌

二章

秋風辭

蒲梢天馬歌

李夫人歌

落葉哀蟬曲

車子侯歌

昭帝

黃鵠歌

淋池歌

樂府廣序

卷三 目次

漢

歌詩上

靈帝

招商歌

樂府廣序目次

卷之二十五終

樂府廣序

卷之二十五

浙西止谿圃人朱嘉徵論正

漢一

歌詩上

序曰漢藝文志載歌詩二十八家者初樂府未立其聲合樂或間采入樂府之本辭也夫帝王能自爲歌詩開一代風氣無若漢高祖孝武帝唐則太宗玄宗焉魏武帝詩聲皆成樂章與典午讌歌頗以霸心自文安居變雅之始其時爲之乎文帝曠世逸才梁武帝雅知樂力追之苦不逮無言簡文以下蓋漢歌大度深思規模弘遠矣高祖嘗自言乃公馬上得天下

安事詩書及過沛與故人父老子弟飲酒歡宴則思
猛士卒以平勃靖亂功成宴如豈偶然哉武帝自臨
塞決河遂定宣房之功太史公聞瓠子詩而悲之作
河渠書以章明德此與天馬芝房之歌以瑞應遠略
自誣其悖德故自不侔矣逮立樂府鄒子樂司馬長
卿之徒未嘗及此雖略論律呂而義不雅馴史譏制
氏但能記其鏗鏘鼓舞而不能言其義曷足怪焉余
覽藝文志頗載高祖歌詩及漢興以來巡守遊行及
兵所誅滅上而泰一甘泉壽宮宗廟宮壺之什下至
三輔郡國雜各有主名或無主名並歌聲曲折合得
詩二百餘篇然其辭闕者有間而郭氏樂府大風歌

曰大風起。乃與力拔山操等。載琴曲。高帝楚歌。武帝
李夫人歌。烏孫公主歌。並載雜歌謠中。如瓠子秋風
歌。則闕之。無所繫也。未稱一代義法。輒心悼久之。爲
之引義考聲。以倡四始。於漢首大風歌。魏首短歌行。
晉以下別叙之。詩序所稱。言天下之事。形四方之風
者乎。其郡國所詠。以及賢人君子。相與感時悼事。一
時政治之得失。風俗之哀樂。形焉。所以明王道。治亂
之所本也。爲撰漢魏歌詩合四卷。列諸三調清商雜
曲之後。俾後之頌詩論世。空知漢孝武立樂府。採詩
及魏晉樂所奏。蓋與古巡守方岳。貢正聲。與輔軒獻
詩。使太師箴聲之上下。以詔於王。略有分矣。此班馬

之徒致譏於天馬而不叙福應之繇也夫

梁元帝纂要齊歌曰謳吳歌曰歛楚歌曰豔浮歌曰哇振旅而歌曰凱歌堂上奏樂而歌曰登歌亦曰升歌故歌曲有陽陵白露朝日魚麗白水白雪江南陽春淮南駕辯綠水陽阿採菱下里巴人又有長歌短歌雅歌緩歌浩歌放歌怨歌勞歌等行漢世有相和歌本出於街陌謳謠而吳歌雜曲始亦徒歌復有但歌四曲亦出於漢世無弦節作伎最先一人唱三人和魏武帝尤好之時有宋容華者清徽好聲善唱此曲當時特妙自晉已後不復傳遂絕凡歌有因地而作者京兆邯鄲歌之類是也有因人而作者孺子才人歌之類是也有傷時而作者微子麥秀歌之類是也有寓意而作者張衡同聲歌之類是也甯戚以困而歌項籍以窮而歌屈原以愁而歌卞和以怨而歌雖所遇不同至於發乎其情則一也王僧虔啓古先詩而後聲詩叙事聲成文必使志盡於詩音盡於曲是以辭者其歌詩也聲者若羊吾彝伊那何之類也

高帝

劉邦字季沛豐邑中陽里人初爲泗水亭長縣沛公起兵破秦封漢王將五諸侯滅楚平定天

下卽帝位都長安在位十二年葬長陵
漢書藝文志高祖歌詩二篇
詩品漢高祖武帝作如星漢回天苞符出水自然成章

大風歌

史記本紀十二年十月高祖還歸過沛留置酒沛宮
悉召故人父老子弟縱酒發沛中兒得百二十人教
之歌酒酣高祖擊筑自爲歌詩曰

大風起兮雲飛揚威加海內兮歸故鄉安得猛士兮守
四方

郭茂倩樂府載琴曲曰大風起鄭樵別聲序別聲
者非嘗祀饗之樂漢三侯之章大風歌亦曰風起之
詩左克明古樂府載古歌謠辭
班固沛上銘曰炎火之德彌光以明源清流繁本盛
末榮

王通曰大風安不忘危其霸心之存乎秋風樂極悲
來其憐心之萌乎
鍾惺曰前二句言劍其氣太後一句言守其思遠真

英雄也。

序曰。大風歌成王業之艱也。大度之言。憂思深遠。
按漢書。大風肄於原廟久矣。如樂府詩集所傳。豈稱
得所哉。余爲正之。正之倡於四始。

鴻鵠歌

本紀高帝欲立戚夫人子趙王如意而廢太子。後不
果。戚夫人泣涕。帝曰。爲我楚舞。吾爲若楚歌。

鴻鵠高飛。一舉千里。羽翼已就。橫絕四海。橫絕四海。又
可奈何。雖有矰繳。將安所施。

右見漢書樂府載雜歌辭。古樂府同。史記異作。翻又
作當將作尚。

序曰。鴻鵠歌。太子能得士也。四皓爲輔。不可易矣。

周公制樂章。國風則首文王之齊家。大雅則溯姜源。

太任之德王者蓋重內治哉高帝彊武能摧秦楚馭
群雄而不能制一呂后此歌亦可謂氣盡戚夫人矣
然以太子得四皓成羽翼雖不事詩書而畏清議亦
非後代王者所及也

武帝

各徽景帝中子建元元光元朔元狩元鼎元封
各六年太初天漢太始征和各四年通在位五
十四年葬茂陵

瓠子歌

二章

史記河渠書元封二年四月天子用事萬里沙還自
臨決河沈白馬玉璧于河令羣臣從官自將軍以下
皆負薪寘決河是時東郡燒草以故薪柴少而下淇
園之竹以爲榱天子既臨河決悼功之不成乃作歌
二章於是卒塞瓠子作宮其上曰宣房宮

瓠子決兮將奈何皓皓肝肝兮閭殫爲河殫爲河兮地

樂府詩集

卷五 漢

歌詩上

四

不得寧功無已時兮吾山平吾山平兮鉅野溢魚沸鬱
兮柏冬日延道弛兮離嘗流蛟龍騁兮方遠遊歸舊川
兮神哉沛不封禪兮安知外爲我謂河伯兮何不仁泛
濫不止兮愁吾人齧桑浮兮淮泗滿久不返兮水維緩

樂府載雜歌辭左本同

集考漢書皓皓作浩浩肝肝作洋洋閭作慮滯作弗
延作正方作放吾山卽東阿魚山蘇子決灌鉅野
澤齧桑縣名

河湯湯兮激潺湲北渡迂兮浚流難攀長茭兮沈美玉
河伯許兮薪不屬薪不屬兮衛人罪燒蕭條兮噫乎何
以禦水頽林竹兮槌石齧宣房塞兮萬福來

集考漢書迂作回浚作迅頽作隤房作防今從史記
槌柱也木立死曰槌

王世貞曰漢武誅伐固不愛通侯之賞亦大者抵罪
小者奪爵而所任汲仁輩不以河故少貶其秩乃親

臨祭令羣臣負薪寘夾河功成歌詠之蓋真見夫治河之艱于治邊也。

序曰瓠子歌美武帝也河功告成以寧人息事焉。

太史公悲瓠子詩而作河渠書悲其恤民也起調與雲漢詩同率作分功都兒要領。

秋風辭

班固武帝故事帝行幸河東祠后土顧視帝京忻然中流與羣臣飲讌帝懼甚乃自作秋風辭。

秋風起兮白雲飛。艸木黃落兮鴈南歸。蘭有秀兮菊有芳。懷佳人兮不能忘。沉樓船兮濟汾河。橫中流兮揚素波。簫鼓鳴兮發權歌。歡樂極兮哀情多。少壯幾時兮奈老何。

藝文志武帝出游巡狩歌詩十篇

集考詩說三四絕似楚詞沉有芷兮澧有蘭思公子

樂府集卷三
今未敢言。帝讀書故有沿襲。

序曰。秋風辭。帝悔過之詩也。武帝英主。一切甲兵。神仙聲色。土木之娛。多所不諱。顧此表裏河山。撫時增感。喟然於立業之不易。豈不壯哉。

蒲梢天馬歌

史記武帝伐大宛。得千里馬。名蒲梢。作歌。

天馬徠兮從西極。經萬里兮歸有德。承靈威兮降外國。涉流沙兮四服。

古樂府載歌辭
集考降。一作障。

序曰。蒲梢天馬歌。武帝示服遠也。周書作旅獒。及越裳操。昭德之致。無遠弗届。汲長孺學黃老。不解音。故

譏爾以余觀於郊祀太一二章不及帝歌遠甚。

李夫人歌

漢書外戚傳夫人早卒帝思念不已方士齊人少翁致其神帝愈益相思悲感爲作詩令樂府絃歌之。

是邪非邪立而望之爾何姍姍其來遲。

樂府載雜歌辭

漢書本傳上作賦傷悼夫人畧曰念窮極之不還兮惟幼眇之相羊函茝蒻扶以俟風兮芳雜集以彌章的容與以猗靡兮縹緲姚乎愈莊注言夫人色如春華含茝蒻散以待風雖縹緲姚益復端倪耳。

集考茝音綏扶音敷翻傳作偏樂府同許彥周詩話云韓退之走馬來看立不正是也按此並爲歌辭寫格。

劉鋹曰陳思王稱李延年嫺于增損古辭多者減之貴約也觀高祖之詠大風孝武之數來遲被聲自協于建士衡咸有佳篇並無詔伶人故事謝綵管俗稱乖調。

序曰李夫人歌明主一惑也咏落葉哀蟬曲是爲再

感英雄帝王不妨情至。按武帝圖畫夫人於甘泉宮唐白樂天詩云君恩不盡念未已甘泉殿裏合寫真丹青畫出竟何益不言不笑愁殺人似爲秦陵楊妃寓言爾。

落葉哀蟬曲

武帝思懷李夫人不可復得時穿昆明之池泛翔禽之舟帝自造歌曲使女伶歌之。時日已西傾涼風激水。女伶歌聲甚道。因賦落葉哀蟬之曲。

羅袂兮無聲。玉墀兮塵生。虛房冷而寂寞。落葉依於重扇。望彼美之女兮。安得感余心之未寧。

漢書關見王子年拾遺記

詩紀載歌辭

序曰落葉哀蟬曲楚調也。開後人玉墀蛾眉諸怨。

車子侯歌

車子侯者扶風人。武帝愛其清淨，稱遷其位至侍中。一朝語家云：我今補仙官。此春應去。至夏中當暫還。還少時復去。如其言。武帝思之，乃作歌。

嘉幽蘭兮延秀，覃妖嬌兮中濟。華斐斐兮麗景，風徘徊兮流芳。皇天兮無慧，至人逝兮仙鄉。天路遠兮無期，不覺涕下兮霑裳。

漢書關見洞仙傳

詩紀外集

集考。史記封禪書：天子封太山，其下則有玉牒書。書祕。天子獨與侍中奉車子侯上泰山，亦有封。其事皆禁。上復東至海上望，冀遇蓬萊焉。奉車子侯暴病一日死。上乃遂去，羣昭注：子侯霍去病之子。葦菌也。葦上聲。又音優。陸士龍美祁陽詩：思樂葛藟薄采其藟。疾彼攸遂，乃孚惠心。謹按：武帝集帝與子侯家語，道士皆言子侯得仙，不足悲。而新論風俗通則云：帝故殺之，其說互乖異。

序曰車子侯歌錄功臣之後悼其亡也 楚調冬風

與哀悼李夫人賦辭相亞

昭帝

名弗陵武帝少子母趙婕妤號稱弋夫人孕十
四月而生帝年八歲即位始元元鳳各六年元
平元年通在位十三年薨平陵

黃鵠歌

西京雜記始元元年黃鵠下太液池帝爲此歌

黃鵠飛兮下建章羽肅肅兮行踟蹰金爲衣兮菊爲裳
嗟喋荷荷出入蒹葭自顧菲薄愧爾嘉祥

樂府載雜歌辭

章注時帝年九歲作

集考臨高臺黃鵠高飛離鼓鵲開弓射鵠令吾主壽
萬年此漢武宴柏梁時也鵠本白今黃鵠間見故以
爲瑞

序曰黃鵠歌漢道之應也歌調不事矜夸謙冲省德

誠守文令主哉

淋池歌

昭帝時穿淋池東引太液之水植分菱荷一莖四葉狀如駢蓋花葉雜莖芬馥徹十餘里帝命水嬉以文梓爲船木蘭爲柁隨風輕漾畢景忘歸乃至通夜使宮人歌曰

秋素景兮泛洪波揮纖手兮折菱荷涼風淒淒揚棹歌
雲光開曙月低河萬歲爲樂豈云冬

漢書閼見拾遺記詩紀載歌辭章樵曰帝冲聖嗣位天安頗高輔導承弼者非其人忌無逸之戒溺于游樂卒天天年性之不彌豈不惜哉辭云雲光開曙蓋達曉也

序曰淋池歌昭帝之愆已侈也霍子孟不能亡行

靈帝

諱宏河間孝王之曾孫先封解濟亭侯桓帝薨寶武迎立在位二十二年

招商歌

拾遺記。靈帝初平三年。遊于西園。乘船游灣。奏招商之曲。以來涼風。歌曰。

涼風起兮日炤渠。青荷晝偃葉夜舒。惟日不足樂有餘。清絲流管歌玉鳧。千年萬歲嘉難踰。

詩紀載歌辭

集考。帝于西園起裸游館。千間。引渠水繞砌。周流澄徹。渠中植蓮大如蓋。長一丈。南國所獻。其葉夜舒晝卷。名夜舒荷。玉鳧。曲名。章注。秋屬金。十五音爲商。招商者。迎秋音也。

序曰。靈帝招商歌。感古曲。歌苓落之什焉。記曰。亡國之音哀以思。招之云召也。召亂也。

樂府廣序目次

卷之二十六

漢二

歌詩中

西楚霸王

垓下歌

虞美人曲

戚夫人

春歌

趙幽王

幽歌

朱虛侯

耕田歌

樂府廣序

卷三十六目次

漢

歌詩中

李延年

歌

東方朔

據地歌

烏孫公主

悲愁歌

李陵

別歌

燕刺王

歌

華容夫人歌

廣陵厲王

瑟歌

廣川王

望卿歌

修成歌

到暉

拊缶歌

王吉

射鳥辭

梁鴻

五噫歌

孔融

六言詩

三章

竇玄妻

古怨歌

蘇伯玉妻

盤中詩

樂府廣序目次

卷之一十六終

樂府廣序

卷之二十六

浙西止谿圃人朱嘉徵論正

漢二

歌詩中

西楚霸王

項羽字籍

垓下歌

漢書高祖圍項羽垓下是夜聞漢軍皆楚歌驚曰漢已得楚乎起飲帳中有美人姓虞氏嘗從駿馬名騶嘗騎之乃悲歌慷慨自爲歌詩數曲美人之和

力拔山兮氣蓋世時不利兮騶不逝騶不逝兮可奈何
虞兮虞兮奈若何

右載前漢書藝文志漢興以來兵所誅滅歌詩十
四篇樂府載琴曲瑟琴集力拔山操項羽所作也

漢書

樂府歌詩中

二

近世虞美人曲出此

王世貞藝苑卮言曰。垓下歌悲壯。嗚咽與大風各有

氣象。

范曄曰。太史公以羽紀列漢紀之前。不以成敗論人

耳。垓下悲歌。應附漢雜歌。不宜入琴曲也。此郭氏之

謬。近世虞美人曲。如漢兵略地。知爲俗師所傳。然聲

調古穆。應次垓下爲古歌。

序曰。垓下歌。琴曲改歌。力拔山操。後人弦之以爲戒也。英雄失利時。或有之。何至如虞姬所歌。意氣頓盡也。高帝屢退。頗有餘力。此爲大勇。

虞美人曲

漢兵已略地。四面楚歌聲。大王意氣盡。賤妾何聊生。

右見漢書正義

序曰。虞美人曲。楚歌本辭也。姬之從容就義。殊勝戚

姬春歌

戚夫人

春歌

漢書外戚傳高帝得定陶戚姬愛幸生趙隱王如意惠帝立呂后爲皇太后適令永巷囚戚夫人髡削衣赭衣令春戚夫人春且歌太后聞之大怒曰乃欲倚子邪召趙王殺之戚夫人遂有人彘之禍

子爲王母爲□終日春薄暮嘗與死爲伍相離三千里當誰使告汝

樂府雜歌辭

序曰春歌漢家首失齊一之化矣辭累上焉呂后之虐志在誅戚久矣反以子爲王一語中其所忌悲夫

趙幽王

諱友高帝子

幽歌

漢書列傳孝惠時友以諸呂女爲后。不愛。愛它姬。諸呂女譏之于太后。太后怒。召趙王置邸。令衛圍守之。趙王餓乃作歌。遂幽死。

諸呂用事兮。劉氏微迫。脅王侯兮。疆授我妃。我妃既妬兮。誣我以惡。讒女亂國兮。上曾不寤。我無忠良兮。何故棄國。自決中野兮。蒼天與直。干嗟不可悔兮。寧早自財。爲王餓死兮。誰者憐之。呂氏絕理兮。託天報仇。

樂府載雜歌辭

惡一故反

序曰。幽歌。歌諸呂刺呂后失德也。按蒼天與直一語。千古如生。春秋晉其世子死曰。我得請於帝矣。殊

有此生氣

朱虛侯

諱章齊悼惠王肥次子高后元年入宿衛封朱虛侯文帝二年以誅呂產功封城陽王

耕田歌

史記呂后本紀諸呂擅權用事章忿劉氏不得職嘗入侍宴太后令爲酒東章自請曰臣將種也請以軍法行酒太后曰可酒酣章進飲歌舞請爲耕田歌頃之諸呂有一人醉亡酒章追拔劍斬之太后大驚業已許其軍法無以罪之

漢耕穡種立苗欲疏非其種者鋤而去之

詩紀載歌辭樂府闕

序曰耕田歌諷呂氏也主少國疑不可少此舉動

史稱劉氏爲益疆孝惠孱主不能一振母蠱危矣孝

威壯主也察劉光祿精忠而不能奪王氏權以至於

亡獨何歟

李延年

中山人故倡也坐法腐刑給事狗監中以女弟李夫人得幸武帝貴爲協律都尉

歌

漢書外戚傳延年性知音善歌舞武帝愛之常侍上起舞而歌上歎息曰世豈有此人乎平陽主因言延年有女弟上召見之實妙麗善舞絲是得幸

北方有佳人。絕世而獨立。一顧傾人城。再顧傾人國。寧不知傾城與傾國。佳人難再得。

樂府載雜歌辭

序曰北方有佳人。協律被幸。自媒其女弟焉。雙飛入紫宮之謠諷帝也。余諷漢歌詩好德如執扇好色如佳人。直繼變風而作。

東方朔

字曼倩平原厭次人武帝時待詔公車累遷大中大夫給事中

據地歌

漢書列傳朔爲郎嘗侍中。人皆以爲狂。朔曰。如朔所謂避世于朝廷間者也。時坐席中。酒酣據地歌曰。

陸沈於俗。避世金馬門。宮殿中可以避世。全身何必深山之中。蒿蘆之下。

樂府闕見詩紀

集考俗世下三字叶韻錄韻俗古叶聚下叶戶三百篇多如此

序曰。據地歌風世也。曼倩託跡玩世。志在諷諫。所以自命甚高。觀匡衡輩抗疏賣名。諷者百一。公孫弘輩平居宮殿中。惟學全身。生誠子詩。處世尚中。從此看得

烏孫公主

悲愁歌

漢書西域傳武帝元封中遣江都王建女細君爲公主以妻烏孫王昆莫公主至其國自治宮室居歲時一再與昆莫會置酒飲食昆莫年老言語不通公主悲乃自作歌。

吾家嫁我今天一方遠託異國今烏孫王穹廬爲室兮
羶爲牆以肉爲食兮酪爲漿居嘗土思兮心內傷願爲
黃鵠兮歸故鄉

樂府載雜歌辭

序曰烏孫公主歌遠嫁帝和西戎分單于勢謀北伐
也武帝酒數世之耻春秋大之

李陵

字少卿廣之孫以騎都尉擊匈奴降立爲右校

別歌

漢書列傳昭帝時。匈奴與漢和親。漢使求蘇武等。單于許武還。李陵置酒。賀武曰。異域之人。一別長絕。因起舞而歌。泣下數行。遂與武訣。

徑萬里兮渡沙漠。爲君將兮奮匈奴。路窮絕兮矢刃摧。
士衆滅兮名已隕。老母已死。雖欲報恩。將安歸。

樂府載雜歌辭。玉臺集載歌詩。

序曰。李都尉別歌。傷自絕於漢也。母死名敗。百身莫贖。太史公不爲陵立傳。於其祖廣傳。微文略見。言自後李氏名敗。隴西之士。居門下者。皆用爲恥焉。畢竟功不補罪。後人愛陵才氣。并恕其節。當亦非少卿所自許。其自明已志。正在言表。與子長報任安書相

將按本傳僅列此歌五言詩及答子卿書並闕劉劭
幾謬謂僞作何歟

燕刺王

諱旦武帝第四子

歌

漢書列傳昭帝時旦自以爲武帝子且長不得立乃與旦姊蓋長公主左將軍上官桀交通謀廢帝迎立蓋王舍人父燕倉知其謀告之縣是發覺王憂懣置酒萬載宮會賓客羣臣妃妾坐飲王自歌華容夫人起舞坐者皆泣王遂自殺

歸空城兮狗不吠雞不鳴橫術何廣廣兮固知國中之無人

華容夫人歌

髮紛紛兮寘渠骨籍籍兮亾居母求死子兮妻求死夫

裴回兩渠間兮。君子將安居。

右二曲樂府載雜歌辭
集考術道路也廣讀曠兩渠宮中池沼

序曰燕刺王歌。自傷無賓友也。初上不爲置貴彊相
廷無諫諍。以至於亾。然王亦見之晚矣。其責人也不
如歸責君子。故華容歌蓋訟王也。

廣陵厲王

諱胥武帝第五子

瑟歌

本傳昭帝時。嘗見帝年少無子。有覲欲心。迎女巫李
女須。使下神咒詛。宜帝卽位。咒詛事發。覺胥置酒顯
陽殿。召太子霸及子女等夜飲。使所幸幸鼓瑟歌舞。王
自歌。左右悉涕泣。奏酒至。雞鳴時罷。

欲久生兮無終。長不樂兮安窮。奉天期兮不得須臾。千
里馬兮駐待路。黃泉下兮幽深。人生要死。何爲苦心。何

用爲樂心所喜出入無怵爲樂亟蒿里召分郭門閤死
不得取代庸身自逝

樂府載雜歌辭
集考庸如徭役取代也逝合韻上列反

序曰廣陵王瑟歌死而靡悔宜其亡也余讀武帝
賜二王策書而歎之旦受玄社膏受赤社曰母作裴
德母邇宵人世爲漢蕃輔誠令二王寶此訓詞豈有
他日之禍哉余錄數詩以爲藩侯之戒

廣川王

諱去繆王齊太子

歌三章

漢書廣川王去以陽城昭信爲后幸姬陶望卿爲修
靡夫人主繪帛崔修成爲明貞夫人主永巷後昭信
譖望卿失寵去與昭信等飲諸婢皆侍去爲望卿作
歌曰背尊章竟殺望卿昭信欲擅愛曰王使明貞夫

人主諸姬。淫亂難禁。乃盡閉諸姬舍門。上箚于后。非大置酒召不得見。去憐之。爲作歌曰。愁莫愁。

背尊章。嫖以忽。謀屈奇。起自絕。行周流。自生患。諒非望。令誰怨。

右望卿歌

愁莫愁。生無聊。心重結。意不舒。內第鬱。憂哀積。上不見。天生何益。日崔隤。時不再。願弃軀。死無悔。

右修成歌 樂府載雜歌辭 西京雜記廣川王去疾

序曰廣川王歌望卿再歌修成愛憎之變也。有國者。可以前見賢。而後見不肖乎。

郅惲

字子幼。宣帝時人。以兄忠任爲郎。霍氏謀反。惲先以聞。封平通侯。遷中郎將。廉潔無私。然好發人陰伏。繇是多怨。與太僕戴長樂相失。上書告其罪。免爲庶人。坐怨望誅。

拊缶歌

本傳。惲既失爵位。家居治產業。起室宅。友人安定太守孫曾宗與惲書諫戒之。惲內懷不服。答曾宗書云。田家作苦。歲時伏臘。烹羊炰羔。斗酒自勞。家本秦也。能爲秦聲。婦趙女也。雅善鼓瑟。奴婢歌者數人。酒後耳熱。仰天拊缶。而呼烏烏。其歌曰。

田彼南山。蕪穢不治。種一頃豆。落而爲箕。人生行樂耳。須富貴何時。

古樂苑載雜歌辭

集考。張晏注。山高在陽。人君之象。蕪穢不治。朝廷荒亂也。一頃百畝。喻百官也。豆者。貞實之物。當在田倉。萁豆並落。落在野。喻見放棄也。楚昭王聘孔子。孔子乃歌曰。大道隱兮。禮爲萁。賢人竄兮。將待時。田讀甸。治平聲。

序曰。拊缶歌。南山譏時也。漢法寬大。搢紳以文字取禍。則惲爲之首。夫人臣得罪於上。不退自省。過宜

其及也可爲人臣怨望者戒。

王吉

射鳥辭

漢明帝起居注。上東巡。有鳥飛鳴。乘輿上。虎賁郎王吉射中之。遂作辭。帝賜錢百萬。令亭壁皆畫鳥。

烏鳥啞啞引弓射。洞左腋。陛下壽萬年。臣爲二千石。

樂苑載雜歌辭。

風俗通並載。

序曰。虎賁郎歌射鳥。人臣之義也。按射鳥。偶然事

耳。至蒙賜錢獻詩。漢世用人不次。於此可見。余讀

顏光祿赭白馬賦。惕飛鳥之時衡。故祇慎乎所嘗忽

敬備乎所未防。真見微之論。

梁鴻

字伯鸞。平陵人。家貧尚節。介與妻孟光隱居霸陵山中。後東出關。適吳易姓。運期名耀。依皋伯

通廡下潛開著書十餘篇卒塋要離塚旁

五噫歌

三輔決錄梁鴻東出關過京師作五噫之歌肅宗聞而非之求鴻不得

陟彼北芒兮噫顧瞻帝京兮噫宮闕崔巍兮噫民之劬
勞兮噫遼遼未央兮噫

樂府載雜歌辭

序曰五噫歌刺時也明帝苛切敬陵濟之以寬當漢
盛時特啟外戚持權之漸鴻乃去國不旋踵豈非明
於治亂之數哉按揚子雲以孔子去魯歌爲雉噫
感山梁雌雉而作也或稱此歌爲雉噫之遺賢人隱
可以占國矣

孔融字文舉魯國人少有重名舉高第爲侍御史遷
累遷大中大夫數以書爭曹操爲操所害

六言詩

漢家中葉道微董卓作亂乘衰僭上虐下專威萬官惶
怖莫違百姓慘慘心悲

郭李分爭爲非遷都長安思歸瞻望關東可哀夢想曹
公歸來

從維到許巍巍曹公憂國無私減去厨膳甘肥群僚率
從祈祈雖得俸祿嘗饑念我苦寒心悲

右三章載詩紀

序曰孔北海六言詩歌漢家中葉美魏公也章升

道云。文舉平生。譏嘲曹公如小兒耳。六言詩。似非真。余曰。非也。魏書稱曹公初仕漢。約已奉公。謙恭下士。文舉亦應頰首。觀其論盛孝章書。可見矣。

寶玄妻

古怨歌

玄狀貌絕異。天子使出其妻。妻以公主。妻悲怨。寄書及歌與玄。時人憐而傳之。

歟。歟。白兔東走。西顧衣不如新。人不如故。

詩紀一名豔歌

歐陽詢藝文類聚。載玄妻別玄書一首云。棄妻斥女。敬白寶生。卑賤鄙陋。不如貴人。妾日以遠。彼日以親。何所控訴。仰呼蒼昊。悲哉寶生。衣不厭新。人不厭故。悲不可忍。厭不可去。彼獨何人。而居斯處。

序曰。古怨歌。歟。歟。棄婦之辭。志諷也。屈平所謂悲。

莫悲兮生別離。故君舊友同此妻絕。

蘇伯玉妻

盤中詩

山樹高鳥鳴悲。泉水淙鯉魚肥。空倉鵲嘗苦饑。更人婦
會夫希。出門望見白衣。謂當是而更非。還入門中心悲。
北上堂西入階。急機絞杼聲催。長歎息當語誰。君有行
妾念之。出有日。還無期。結巾帶。長相思。君忘妾。未知之。
妾忘君。罪當治。妾有行。宜知之。黃者金。白者玉。高者山。
下者谷。姓者蘇。字伯玉。人才多。知謀足。家居長安身。在
蜀。何惜馬蹄歸。不數羊肉千斤酒百斛。令君馬肥麥與
粟。今時人知四足。與其書不能讀。當從中。只則四角。

詩紀載樂府詩集闕

序曰。盤中詩。歌山樹高望遠人也。思而不貳。風人詠之。兩漢多才婦。事處變而風不失正焉。上繼團扇之徽。下振迴文之秀。

樂府廣序

卷之二十六終

男 爾邁謹訂

樂府廣序目次 卷之二十七

漢三

歌詩下

雞鳴歌

平城歌

畫一歌

淮南歌

衛皇后歌

鄭白渠歌

潁川歌

匈奴歌

匡衡歌

牢石歌

五侯歌

司隸歌

博南歌

荏都歌 三章

董逃歌

樊惠渠歌

樂府廣序目次

卷之二十七終

樂府廣序

卷之二十七

浙西止谿圃人朱嘉徵論正

漢三

歌詩下

雞鳴歌

沈建樂府廣題。漢有雞鳴衛士。主雞唱宮外。舊儀宮中與臺。並不得畜雞。晝漏盡。夜漏起。中黃門持五夜。甲夜畢。傳乙。乙夜畢。傳丙。丙夜畢。傳丁。丁夜畢。傳戊。戊夜是為五更。未明三刻。雞鳴衛士起唱。此歌蓋漢歌也。志林。汝南出長鳴雞。衛士候于朱雀門外。專傳雞唱。晉太康地道記。後漢士習此曲。於闕下歌之。今雞唱是也。

東方欲明星爛爛。汝南晨雞登壇喚。曲終漏盡嚴具陳。月沒星稀天下旦。千門萬戶遞魚鑰。宮中城上飛鳥鵲。

樂府廣序

卷三

漢

歌詩下

一

樂府載歌辭左克明古樂府闕集考漢書項羽夜聞漢軍四面皆楚歌應劭曰楚歌雞鳴歌也蓋楚歌傳五夜漢雞鳴倣此而起今衛士歌之魚鱸取魚目不填守夜之義

序曰雞鳴歌歌東方勤政也傳稱周康王晏朝關雎諷之變風不夙則莫刺也吾於雞鳴正始焉唐白居易長恨歌從此君王不早朝刺也

平城歌

漢書高帝自將三十二萬擊韓王信帝先至平城步兵未盡到冒頓縱精兵三十餘萬圍帝于白登七日漢兵中外不得救餉樊噲時爲上將軍不能解圍天下皆歌之後用陳平秘計得免

平城之下亦誠苦七日不食不能殼弩

樂府載雜歌辭

古樂府同

序曰讀平城歌王業旣成親征王者重之高祖不

用婁敬之謀豈非輕敵唐太宗親出面之渭橋頗見
雄略正以有備故憚之使不敢動也

畫一歌

漢書惠帝時曹參代蕭何爲相國初高帝與何定天下法令既明具及參守職舉事無所變更一遵何之約束于是百姓歌之

蕭何爲法類若畫一曹參代之守而勿失載其清靜民
以寧一

樂府載雜歌辭 樂府較作講靜作爭一作壹今從
史記

序曰畫一歌定治也天下新去湯火與民休息蓋法
令一則民志寧而國勢固於磐石矣故曰法者治之
正

淮南歌

漢書淮南厲王長高帝少子也長廢法不軌文帝不忍置子法廷載以輜車處蜀嚴道邛郫遣其子子母從居長不食而死後民有作歌帝聞之廷追尊淮南王爲厲王置園如諸侯儀。

一尺布尚可縫一斗粟尚可舂兄弟二人不相容。

藝文志淮南歌詩四篇

樂府載雜歌辭

序曰淮南歌尺布美文帝能受言也王者總天下之智以助聰明其事莫長於採風謠自考得失云長以罪誅國法也兄弟私恩也爲天下者不以私恩廢公法孝文尙采風而復之可謂義之盡仁之至者也。

衛皇后歌

漢書衛子夫爲皇后弟青貴震天下。天下歌之。外戚傳衛子夫爲平陽主。謳者武帝被霸上還過平陽主。既飲。謳者進。帝獨說子夫。帝起更衣。子夫侍。尚衣軒中得幸。平陽主因奏子夫。送入宮。是爲衛皇后。

生男無喜。生女無怒。獨不見衛子夫霸天下。

樂府載雜歌辭

序曰。歌稱衛皇后。譏不終也。一曰。不正其名。風上也。后以謳者進。河洲之義衰焉。唐李白詩。以色事他人。能得幾時好。千古達論。

鄭白渠歌

史記。河渠書。初韓聞秦好興事。欲罷之。毋令東伐。迺使水工鄭國。間說秦。令鑿涇水。自中山西抵郿口。爲渠。並北山。東注雒。溉烏鹵之地四萬餘頃。因名曰鄭國渠。太始二年。趙中大夫白公復奏穿渠。引涇水。首起谷口。尾入櫟陽。注渭中。袤二百里。溉田四千五百餘頃。名曰白渠。民得其饒。歌之曰。

田於何所。池陽谷口。鄭國在前。白渠起後。舉鍾如雲。決渠爲雨。涇水一石。其泥數斗。且溉且糞。長我禾黍。衣食京師。億萬之口。

樂府載雜歌辭

集考詩酌以大斗。鄭玄注音主口。孔五切。

序曰。河渠歌。鄭白美利民也。足國之道。寓焉。余嘗言漢之白公。田千秋。趙過。諸公。其績不在蕭曹下。

潁川歌

漢書灌夫不好文章。喜任俠。已然諾。諸所與交通。無非豪傑大猾。家累數千萬。食客日數十百人。陂池田園。宗族賓客。爲權利橫潁川。潁川兒歌之。

潁水清。灌氏寧。潁水澗。灌氏族。

樂府載歌辭

序曰：潁川歌刺時也。爲士大夫封殖之戒。云石季倫被刑，歎曰：「輩利吾財耳，灌將軍未免以財自累。」

匈奴歌

漢書：元狩二年春，霍去病將萬騎出隴西討匈奴。過焉支山，千有餘里，其夏又攻祁連山，捕斬甚多。

失我焉支山，令我婦女無顏色。失我祁連山，使我六畜不蕃息。

樂府載雜歌辭

集考：祁連山，卽天山。匈奴呼天爲祁連焉支，卽燕支。

十道志：二山皆美水草。單于嘗怒渾邪王居西方，數爲驃騎所破，欲誅之，故渾邪降。歌疑責渾邪而作。

序曰：歌焉支美王者治外也。史記以歲事匈奴致

海內虛耗，後世遂有漢得中策之議。夫得烏孫斷其

左臂，又降渾邪，不啻支解之。

匡衡歌

漢書衡字稚圭東海承人也世農夫至衡好學家貧傭作以供資用尤精力過絕人諸儒爲之歌曰。

無說詩匡鼎來匡說詩解人頤

詩紀載歌辭

集考易始也張標集韻易正也古解春秋鼎盛以此來古叶聲

序曰匡鼎來善言詩也史稱詩以達意達者往往使人解頤不然詩之失愚非關詩也爲墨守爲膏肓固矣哉按稚圭不以詩見又不以說詩見孝成時奏記中引述風雅則肇自匡丞相盛於劉光祿餘未有其儼要知說詩以解頤爲貴

牢石歌

漢書佞幸傳元帝時石顯爲中書令與僕射牢梁少府五鹿充宗結爲黨友諸附倚者皆得寵位而民歌之言其兼官據勢也

牢邪石邪五鹿客邪卽何纍纍綬若若邪

樂府見雜歌辭

序曰牢石歌宦寺擅權盜弄名器漢治始衰也漢尚經術當時五鹿或以談經顯歌意頗別五鹿於牢石之外稱客尊禮之也朱游得折其角者志僞學堅氷之漸

五侯歌

漢書成帝河平二年悉封舅大將軍王鳳庶弟譚爲平阿侯商爲成都侯立紅陽侯根曲陽侯逢時高平侯五人同日封故世謂之五侯時五侯群弟爭爲奢修後庭姬妾各數十人羅鐘磬舞鄭女作優倡狗馬

逐馳。大治第室。起土山。漸臺。洞門。高廊。閣道。連屬。關
望。百姓歌之。言其奢僭如此。

五侯初起。曲陽最怒。壞決高都。連竟外杜。土山漸臺。西
白虎。

樂府載雜歌辭

集考傳稱成都僞穿長安城。引內豐水。注第中。大陂
曲陽侯第。園中土山漸臺。類白虎殿。則穿城引水。非
曲陽與歌辭不同。高都外杜。皆長安里名。

序曰。五侯歌。風王者慎微也。司馬溫公曰。天子之禮
天子自壞之。謹視此。

司隸歌

後漢書列異傳。鮑宣。宣子永。永子昱。二世皆爲司隸
而乘一驄馬。京師人歌之。

鮑氏驄三人司隸。再入宮馬。雖瘦行步工。

樂府載雜歌辭

序曰司隸歌吏稱其職也節儉正直之風先京師而
被及諸夏矣三世司隸其乘一驄馬盛德事也以
此風尚於朝直繼羔羊之節

博南歌

永平十二年哀牢王柳貌遣子率種人內屬顯宗以其地置哀牢博南二縣割益州郡西部都尉所領六縣合爲永昌郡始通博南山度蘭倉水行者苦之作歌。

漢德廣開不賓度博南越蘭津度蘭倉爲他人

後漢書西南□傳

序曰博南歌風王者悅近以來遠也不勞民而廣地
明帝因哀牢內屬置郡事非得已而歌者苦之豈民
之不可與慮始邪抑帝性偏察所蔽在遠也

祚都□歌

明帝時益州刺史朱輔宣示漢德威懷遠□自汶山以西前世所不至正朔所未加白狼槃木等百餘國皆舉種稱臣奉貢白狼王唐鼓作詩三章歌頌漢德輔使譯而獻之

大漢是治與天合意吏譯平端不從我來聞風向化所見奇異多賜繒布甘美酒食昌樂肉飛屈申悉備蠻□貧薄無所報嗣願王長壽子孫昌熾

右遠□樂德歌

蠻□所處日入之部慕義向化歸日出王聖德深恩與人富厚冬多霜雪夏多和雨寒溫時適部人多有涉危歷險不遠萬里去俗歸德心歸慈母

右遠□慕德歌

荒服之外。土地墮墻。食肉衣皮。不見鹽穀。吏譯傳風。大漢安樂。攜負歸仁。觸冒險狹。高山岐峻。緣崖蟠石。木薄發家。百宿列維。父子同賜。懷抱匹帛。傳告種人。長願臣僕。

右遠□懷德歌見後漢書西南□傳
鍾惺曰詩無文字氣暗合聲詩其朴野處見漢家廣大。

序曰。在都歌三章。漢德遠賓也。帝敬策宗廟。賜民爵。及粟有差禮也。

董逃歌

後漢五行志。中平中。京師歌謠卓也。言雖跋扈。終其殘暴。終歸竄族。

承樂世。董逃遊四郭。董逃蒙天恩。董逃帶金紫。董逃行。

樂府詩集

卷七 漢

歌詩下

七

謝恩董逃整車騎董逃垂欲發董逃與中辭董逃出西
門董逃瞻宮殿董逃望京城董逃日夜絕董逃心摧傷
董逃。

集考楊子董卓傳卓改董逃爲董安。

序曰董逃行歌承樂世刺時也。西京之亂始於五
侯唐室之亂劇於安史。摠自承樂世開之。

樊惠渠歌并序

陽陵縣東其地衍隴土氣辛螫嘉穀不植而涇水長
流光和五年京兆尹樊君勤恤民隱乃立新渠曩之
鹵田化爲甘壤農民怡悅相與謳談疆畔謂之樊惠
渠云其歌曰

我有長流莫或闕之我有溝洫莫或達之田疇斥鹵莫
修莫釐饑饉困悴莫恤莫息乃有樊君作人父母立我

猷猷黃潦膏凝。多稼茂止。惠乃無疆。如何勿喜。我壤旣
營。我疆斯成。泯泯我人。旣富且盈。爲酒爲釀。蒸彼祖靈。
貽福惠君。壽考且寧。

樂苑載歌辭 蔡昌辭

序曰。渠歌樊惠美。惠政不忘所自也。惠政在民。其利
百世。猶曰自我樊父云爾。鄭公白公。不能專美于前
矣。文氣一開一闔。風格絕峻。

樂府廣序

卷二十七

漢書

八

樂府廣序

卷之二十七終

男

爾邁謹訂

樂府廣序目次

卷之二十八

魏十一

歌詩

文帝令詩

黎陽作

饒歌

二曲

陳思王

樂府歌

清歌

嵇康六言詩

六章

阮籍采薪者歌

大人先生歌

樂府廣序目次

卷之二十八終

樂府廣序

卷之二十八

浙西止谿圃人朱嘉徵論正

魏一

歌詩

文帝

諱丕字子桓太祖太子爲五官中郎將嗣位爲王受漢禪

令詩

漢獻帝傳。太史丞許芝條上魏王代漢圖讖。王令曰。昔周文王三分天下有其二。以服事殷。公旦履天子之籍。聽天下之斷。終然復子明辟。吾雖德不及二聖。吾敢忘高山景行之義哉。吾作詩云云。庶欲守此辭以自終。

喪亂悠悠過紀。白骨從橫萬里。哀哀下民靡恃。吾將以時整理。復子明辟致仕。

樂府廣序

卷之二十八

歌詩

一

序曰文帝令詩辭讓漢禪也與晉高祖待罪武陽之句同爲英雄欺人魏公曰吾其爲周文王乎一語較真

黎陽作

奉辭討罪遐征晨過黎山巉岬東濟黃河金營北觀故宅頃傾中有高樓亭亭荆棘繞蕃叢生南望果園青青霜露慘悽宵零彼桑梓兮傷情

右二章載詩紀

序曰黎陽文帝念桑梓而作也其聲颯爽非復混一氣象覺沛宮歌尤見龍成五采

饒歌

謹按魏鼓吹曲不襲漢舊連功德所起別爲魏雅吳曲與之同時遂爲兩晉南北朝法郭氏以臨高臺釣竿行並後代擬曲同次于漢後蓋當時譜曲未入魏樂所奏者今繫之歌詩云。

臨臺行高高以軒下有水清且寒中有黃鵠往且翻行
爲臣當盡忠願今皇帝陛下三千歲宜居此宮鵠欲南
遊雌不能隨我欲躬銜汝口噤不能開欲負之毛衣摧
頽五里一顧六里徘徊

右臨高臺詩紀此曲三段辭不相屬鵠欲南遊以下乃古辭飛鵠行。

序曰臨高臺魏歌臨臺行哀漢道之衰也鑄歌爲燕
樂燕賓旅間歌之或趣山陽公上璽綬時邪故並後
曲不入魏奏

東越河濟水遙望大海涯釣竿何珊珊魚尾何筵筵行

路之好者芳餌欲何爲

右鈞竿行 並文帝辭

序曰鈞竿行魏歌東越河濟兵臨吳會時作文帝嘗顧大江曰長江天塹夫之所以限南北也曲其寓言之歟

陳思王

諱植字子建文帝同母弟也建安十六年封平原侯尋徙臨淄文帝卽位命諸侯並就國

黃初二年貶安鄉侯改封鄆城二年立爲鄆城王四年徙雍丘明帝太和元年改封浚儀三年復還雍丘三年徙東阿六年加封陳王薨年四十一謚曰思 魏志蘇則傳禪代事起子建發服悲泣及司馬孚兩人也

樂府歌

膠漆至堅浸之則離皎皎素絲隨染色移君不我棄讒

人所爲

右載古樂府 樂府闕

序曰樂府歌膠漆嫉讒間也比義深長與采葛風指
則一

清歌

曹植七啟鏡樓于日開宮殿深雲屋照肝崇景山之
高基迎清風而立觀觀游女于水濱抗皓首而清歌
歌曰

望雲際兮有好仇天路長兮往無繇佩蘭蕙兮爲誰修
宴婉絕兮我心愁

右載昭明文選

序曰清歌好仇懷沙之志也余按離騷踵變風變雅

而作子建作騷體純乎風雅之遺。

嵇康

字叔夜，譙郡鉅人，好言老莊而尚奇任俠，寓居山濤為吏部舉康自代，康荅書言不堪流俗非薄湯武大將軍司馬昭聞之而怒，景元三年以鍾會諸殺之。

六言詩六章

外以貪汚內貞穢身滑嵇隱名不為世界所櫻所欲不足無營

右東方朔至清

棄背膏粱朱顏樂此屢空饑寒形陋體逸心寬得志一世無患

右陸古賢原憲

三爲令尹不喜柳下降身蒙耻不以爵祿爲已靜恭古
惟二子。

右楚子文善仕

不願夫子相荆相將避祿隱耕樂道閒居採萍終厲高
節不傾

右老萊妻賢名

爲法滋章冠生紛然相召不停大人玄寂無聲鎮之以
靜自正。

右知慧明

金玉滿堂莫守古人安此羸醜獨以道德爲友故能延
期不朽。

右生生招厚咎並見古樂苑

序曰中散六言歌內貞自樂閒靜也錯序中衡斷不苟尚論有法雅似折楊柳古辭

阮籍字嗣宗陳留尉氏人瑀之子容貌瓌傑志氣宏放初辟太尉掾進散騎嘗侍大將軍昭欲爲其子炎求婚籍乃醉六十日不得言而止後引爲從事中郎籍聞步兵厨多美酒遂求爲步兵校尉縱酒昏酣遺落世事又對人能爲青白眼絲是禮法之士淡所警疾大將軍嘗保持之

采薪者歌

袁淑真隱傳蘇門先生嘗行見采薪于阜者先生歎曰汝將以是終乎哀哉薪者曰以是終者我也不以是終者我也因歌二章莫知所終

日沒不周西月出丹淵中陽精蔽不見陰光代爲雄亭在須臾厭厭將復隆離合雲霧兮往來如飄風富貴

俯仰間貧賤何必終畱侯起亾□威武赫荒□邵平封
東陵。一旦爲布衣。枝葉托根柢。死生同盛衰。得志從命
升。失勢與時墮。寒暑代征邁。變化更相推。禍福無嘗主
何憂身無歸。推茲繇斯理。負薪又何哀。

右載詩紀

序曰。採薪者歌。步兵達觀時變也。與大曲滿歌行同
調。嗣宗發言立遠不及世務類此。

大人先生歌

天地解兮六合開。星辰隕兮日月頽。我騰而上將何懷。

右載古樂苑

序曰。余誦大人先生歌爲之歎曰。憂時君子履時悼

樂府廣序

卷六

樂府廣序

五

道豈不殆哉其有河清美人之思乎。

樂府廣序

卷之二十八終

男

爾邁謹訂

樂府廣序目次 卷之二十九

漢

琴曲

採芝操

紫芝歌

八公操

昭君怨

歸風送遠操

霍將軍琴歌

司馬相如琴歌

蔡文姬□笳十八拍

於忽操 三曲

樂府廣序目次

卷之二十九終

樂府廣序

卷之二十九

浙西止谿圃人朱嘉徵論正

漢一

琴曲

序曰。余聞之嵇生衆器之中。琴德最優。其才之生也。玉醴涌其前。玄雲蔭其上。翔鸞所集。清露所潤。惠風所颺。消子宅焉。夫固自然神麗。而足思願。愛樂者矣。及其初調。美聲將興。狀若崇山。又象流波。或徘徊顧慕。從容秘翫。闔爾奮逸。風駭雲亂。然非曠遠者。不能與之嬉游。非夫淵靜者。不能與之閒止也。至哉言乎。余於琴德。悔其少習。不大工。鐘律之數。未習也。禮樂

之情未達也。豈能遽得其志。見其人歟。爰考琴論律呂諸書。琴起黃鐘之宮。七徽爲聲律之始。夫黃鐘。君也。君尊而不用。大均細均。繇是得序。中聲以降。不容彈矣。煩手淫聲。於焉失響。斯漢魏以下。頗可論著。夫後世雅昶歇絕。而操引爲烈。於漢首採芝操。君子謂其風節堪尚也。終於忽操。漢轍旣東。世斯季矣。且嵇生所稱涓子者。謝希逸言劉涓子也。鼓琴善爲白雪之曲。六代人宗師之。余亦首次焉。如鮑明遠之雉朝別鶴。清操可仰。張季鷹作歸思引。幾鑒獨先。劉妙容宛轉歌。其懷人也。死可以生。沈君攸雙燕離。哀時也。遠不忘慕。有足多者。夫琴之爲德也。推遠之卽成器。

數服習之見爲神明故君王御之以安氣體卿大夫士御之以防非僻今夫非僻之心無繇入而氣體寧心志定董子所謂心和而形和諸福之物總至也列琴曲漢魏六朝各一卷三唐別爲序詳集中

集考琴者先王所以修身理性禁邪防淫者也。是故君子無故不去其身。古琴名有清角黃帝琴鳴鹿循。况濫育號鐘自鳴空中。皆齊桓公琴。繞梁楚莊王琴。綠綺司馬相如琴。焦尾蔡邕琴。鳳凰趙飛燕琴也。其曲有暢有操有引有弄。琴論曰和樂而作。命之曰暢。憂愁而作。命之曰操。引者進德修業申達之名。弄者情性和暢寬泰之名。西漢時有慶安世爲成帝侍郎。善爲雙鳳雛鸞之曲。齊人劉道遐能作單鳬寡雀之弄。趙飛燕亦善爲歸風送遠之操。皆妙絕當時。見稱後世。若夫心意感發聲調諧應大弦寬和而溫小弦清廉而不亂。操之濳醇之倫斯盡善矣。

古琴曲五曲。九引。十二操。五曲。一曰鹿鳴。二曰伐檀。三曰騶虞。四曰鵲巢。五曰白駒。九引。一曰烈女引。二曰伯姬引。三曰貞女引。四曰思歸引。五曰露露引。六曰行露引。

日走馬引。七日筌篋引。八日琴引。九日楚引。十二操
一日將歸操。二日倚蘭操。三日龜山操。四日越裳操。
五日拘幽操。六日岐山操。七日履霜操。八日雉朝飛
九日別雀操。十日殘形操。十一日水仙操。十二日襄
陵操。

採芝操

琴集採芝操。四皓所作也。漢書四皓。東園公。綺里季。
夏黃公。角里先生。唐崔鴻曰。四皓爲秦博士。遭世
暗昧。坑黜儒術。於是退而作歌。

皓天嗟嗟。溪谷逶迤。樹木莫莫。高山崔嵬。巖居穴處。以
爲幄茵。曷曷紫芝。可以療饑。唐虞往矣。吾當安歸。

紫芝歌

樂錄南山四皓隱居。高祖聘之。四皓不出。歎而作歌。

莫莫高山。溪谷逶迤。曷曷紫芝。可以療饑。唐虞世遠。吾

將何歸駟馬高蓋其憂甚太富貴之畏人兮不若貧賤之肆志

右二曲並載樂府一見高士傳樂府四皓歌爲唐崔鴻作誤一高山作商雒遠遙作威口今從詩紀

序曰採芝操美高節也四皓初避秦旣而高祖輕士不欲以駟馬高蓋自累及太子以禮致之一出而定儲君之位觀其出處豈同世人之憂樂哉

八公操

謝希逸琴論八公操淮南王作也樂錄淮南好道正月上辛八公來降王作此歌

煌煌上天焰下土兮知我好道公來下兮公將與予生
毛羽兮超騰青雲蹈梁甫兮觀見瑤光過北斗兮馳乘
風雲使玉女兮含精吐氣嚼芝草兮悠悠將將天相保

神仙傳方術之士。人公詣門。授王丹經三十六卷。藥成。未及服。而郎中雷被與伍被共誣稱安謀反。天子使宗正持節治之。人公謂安曰。可以去矣。此乃是天之發遣王。王若無此事。日復一日。未能去世也。人公使安登山。大祭埋金於地。即白日昇天。時人傳人公安臨去時。餘藥置在中庭。雞犬舐之。盡得昇天。故雞鳴天上。大呌雲中也。淮南嬰畧。安陰結賓客。養士數千。高材者八人。蘇非。李尚。左吳。田繇。雷被。伍被。毛被。晉昌號曰八公。與前傳異。

序曰。八公操刺王之失聽也。昔河間獻王好書。實事求是。士以道術進。淮南王亦好書。率多以浮辯進者。使王誠賢者也。豈甘以反謀自裁。爲馬肝石邪。王其終不悟也。愚哉。初伍被忠言不讎。卒以告訐。亦不慚。韋孟諸公矣。

昭君怨

琴操昭君齊國王穰女端正閑麗未嘗窺門戶穰以其有異於人求之者皆不與年十七獻之元帝元帝以地遠不之幸以備後宮積五六年帝每遊後宮嘗怨不出後單于遣使朝貢帝晏之盡召後宮昭君盛飾而至帝問欲以一女賜單于能者往昭君乃越席請行時單于使在旁驚恨不及昭君至匈奴單于大悅以爲漢與我厚縱酒作樂遣使報漢白璧一雙驃馬十匹昭君恨帝始不見遇乃作怨思之歌單于死子世達立昭君謂之曰爲口者妻母爲秦者更娶世達曰欲作口禮昭君乃吞藥而死

秋木萋萋其葉萎黃有鳥處山集於苞桑養育毛羽形容生光旣得升雲上游曲房離宮絕曠身體摧藏志念抑沈不得頡頏雖得委食心有徊徨我獨伊何來往變嘗翩翩之驚遠集西羗高山峨峨河水泱泱父兮母兮道里悠長嗚呼哀哉憂心惻傷

樂府王嬌辭

漢書元帝後宮既多。不得嘗見。乃使画工圖其形。按圖召幸。宮人皆賂画工。昭君自恃其貌獨不與。乃惡圖之。及後。匈奴入朝。選美人配之。昭君之圖當行。及入辭。光彩射人。悚動左右。天子方重信外國。悔恨不及。窮按其事。画工有杜陵毛延壽。棄市。籍其資財。昭君在口。作詩以怨思云。

范曄後漢書昭君入宮。久不見御。積怨因掖庭令請行。單于臨辭大會。豐容靚飾。顧影徘徊。竦動左右。帝驚悔。欲復留。而重失信。遂與之。生二子。

集考。韓子蒼昭君圖序。昭君南郡人。今秭歸縣有昭君村。卒葬匈奴。名曰青塚。晉以文王諱昭。改明妃云。南郡昭君村。生女。必以艾炙其面。慮以色選故也。詩說韋孟詩。雅之變也。昭君怨風之變也。

序曰。昭君怨。自傷不遇。故怨也。樂府豫章行。豔歌行。

二曲。辭作。范蔚宗言。明妃自請行。單于爲琴操。

所本。與前漢書略異。古來才色女子。不安與艸木同腐。空哉。才士亦然。或失身而不悔。近有爲昭君曲者。

曰一代紅顏一擲輕嗚呼所繇異於石家墮樓人矣

歸風送遠操

西京雜記趙后善爲歸風送遠操

涼風起兮天隕霜懷君子兮渺難望感予心兮多慨慷

右樂苑載琴曲樂府關趙后飛燕辭漢書后長安人初屬陽阿主家學歌舞號曰飛燕成帝過主作樂見而說之召入大幸繇倖仔立爲后頗寵十餘年後廢徙北宮自殺

序曰歸風送遠操奏涼風之曲刺鄭聲也志稱孝成時鄭聲尤甚安世慶善爲雙鳳離鸞之曲劉道彊善爲單鳬寡鶴之弄一時貴寵莫並樂書鄭衛之曲動而心淫后不以德升而以色授卒絕繼嗣豈偶然哉唐武后如意娘曲看朱成碧之句同爲鄭聲皆尤

樂府廣序

卷五

琴曲

五

物也。天之所以禍亂人國者。

琴歌

琴操。霍將軍。渡河操。去病所作也。樂錄。霍將軍。封萬五千戶。秩祿與大將軍等。于是志得意歡。而作歌。

四。既護諸夏。康兮。國家安寧。樂未央兮。載戢干戈。弓矢藏兮。麒麟來臻。鳳凰翔兮。與天相保。永無疆兮。親親百年。各延長兮。

樂府。霍去病辭。

序曰。琴歌。歌諸夏康。自矜其伐也。太史公稱驃騎日。益貴。如大將軍。而大將軍日。益退。微文也。卒天。年。豈其器有所不足邪。

琴歌

本傳相如客臨邛富人卓王孫爲具名之相如時從車騎雍容閒雅甚都卓有女文君新寡相如以琴心挑之文君竊從戶窺心悅而好之乃夜亡奔相如與馳歸成都。

鳳兮鳳兮歸故鄉。遨遊四海求其凰。時未遇兮無所將。何悟今夕兮升斯堂。有豔淑女在閨房。室邇人遐毒我腸。何緣交頸爲鴛鴦。□頡頏兮共翱翔。

鳳兮鳳兮從我棲。得托琴尾永爲妃。交情通體心和諧。中夜相從知者誰。雙翼俱起翻高飛。無感我思使余悲。
右二章司馬相如辭

序曰琴歌。歌鳳兮。國風之變也。傳曰。始合不以正。則昏因之道苦矣。衛風弃婦。以鳩之食葢起興。何也。

疏云。鳩食甚過多。則醉而傷其性。司馬琴心亦文君之甚也。此白頭吟所爲作。嗟夫。友之比匪士之失身。可不慎哉。

□笳十八拍

後漢書列女傳。蔡琰字文姬。邕女也。博學有才辭。妙于音律。適河東衛仲道。夫亡無子。歸寧于家。興平中。天下喪亂。文姬沒于南匈奴。□左賢王十二年。生二子。曹操痛邕無嗣。乃遣使者以金璧贖之。而重嫁陳留董祀。後感傷亂離。追懷悲憤。作詩二章。蔡琰別傳。漢末大亂。琰爲□騎所獲。左右賢王部伍中。春月登□殿。感笳之音。作詩言志。曰。□笳動兮邊馬鳴。孤雁歸兮聲嚶嚶。唐劉商序畧。蔡文姬善琴。能爲離鸞別雀之操。□犯中原。掠之入番。爲王后。王甚重之。魏武帝贖以歸漢。□人思慕。乃捲蘆葉爲吹笳表哀怨之音。後董生以琴寫□笳聲。爲十八拍。曰。□笳弄。

我生之初尚無爲我生之後漢祚衰天不仁兮降亂離

地不仁兮使我逢此時。干戈日尋兮道路危。民卒流亡
兮其哀悲。烟塵蔽野兮□□盛志意乖兮節義虧。對殊
俗兮非我空。遭惡辱兮當告誰。笳一會兮琴一拍。心潰
死兮無人知。

詩紀潰死作憤怨。今並從樂府改正。

謹按。首拍志意乖兮。節義虧悲。憤詩之本指也。中分
三節。十拍以前所悲爲失身。中五拍所悲在子。十
六拍以後。舊怨平兮。新怨長。一句轉調。爲重入長安
張本。吞吐詳畧。自成音節。哀怨極矣。情思却正。變
風調也。

序曰。一拍歌我生哀世亂也。文姬自傷悔焉。十八
拍並歸漢後追叙始末之辭。悲憤詩云。薄志節兮念
死難。哀怨之聲。不忘愆已。家考亭曰。琰失節而知耻
賢於楊子雲。信然。范蔚宗嘗載之列女傳。而楊升庵

非之抑何歟

戎羯逼我兮爲室家。將我行兮向天涯。雲山萬重兮歸路遐。疾風千里兮揚塵沙。人多暴猛兮如蟲蛇。控弦被甲兮爲驕奢。兩拍張懸兮弦欲絕。志摧心折兮自悲嗟。

詩紀蟲作虺懸作弦

序曰二拍歌悲嗟初被沒於左賢王也

越漢國兮入□城。亡家失身兮不如無生。糴裘爲裳兮骨肉震驚。羯羶爲味兮枉遇我情。鞞鼓喧兮從夜達明。風皓皓兮暗塞昏營。傷今感昔兮三拍成。銜悲畜恨兮何時平。

詩紀風上有□字塞下少昏字
集考城南單于所居鞞騎上鼓也

序曰三拍歌越漢文姬始履邊庭也

無日無夜兮不思我鄉土稟氣含生兮莫過我最苦天
災國亂兮人無主唯我薄命兮沒戎□殊俗心異兮身
難處嗜欲不同兮誰可與語尋思涉歷兮何難阻四拍
成兮益悽楚

序曰四拍歌無日悲故國也故國亂婦子不終其生
雁南征兮欲寄邊心雁北歸兮爲得漢音雁飛高兮邈
難尋空斷腸兮思悵悵攢眉向月兮撫雅琴五拍泠泠
兮意彌深

序曰五拍歌雁南漢使絕也寓辭征雁

冰霜凜凜兮身苦寒饑對肉酪兮不能餐夜聞隴水兮

聲嗚咽。朝見長城兮。路有漫。追思往日兮。行李難。六拍
悲來兮。欲罷彈。

序曰。六拍歌。冰霜感。行路難也。歸心斯絕。

日暮風悲兮。邊聲四起。不知愁心兮。說向誰是。原野蕭
條兮。烽戍萬里。俗賤老弱兮。少壯爲美。逐有水艸兮。安
家葺壘。牛羊滿野兮。聚如蜂蟻。艸盡水竭兮。羊馬皆徙。
七拍流恨兮。惡居於此。

序曰。七拍歌。日暮流離之感也。班賦原野蕭條。目極
四裔。殊難爲懷。

爲天有眼兮。何不見我。獨漂流。爲神有靈兮。何事處我。
天南海北頭。我不負天兮。天何配我。殊匹儔。我不負神。

兮神何極我越荒州製茲八拍兮擬俳優何知曲成兮轉悲愁。

序曰八拍歌爲天怨曲也夫人疾痛呼父母窮則呼天文姬可謂窮矣詩人許其怨一曰作曲本以遣恨曲成而轉悲何也杜甫詩愁極本憑詩遣興詩成吟咏轉淒涼者是歟。

天無涯兮地無邊我心愁兮亦復然人生倏忽兮如白駒之過隙然不得懽樂兮當我之盛年怨兮欲問天天蒼蒼兮上無緣舉頭仰望兮空雲烟九拍懷情兮誰爲傳。

詩紀爲作與

序曰。九拍歌天無涯。傷時之易逝也。子建賦。紅顏暝而流光。呈才好其莫當。又曰。唯人生之忽過。若盤石之末燿。按此則文姬之才。豈甘與艸木同腐。

城頭烽火不曾滅。疆場征戰何時歇。殺氣朝朝衝塞門。風夜夜吹邊月。故鄉隔兮音塵絕。哭無聲兮氣將咽。一生辛苦兮緣離別。十拍悲涼兮淚成血。

序曰。十拍歌城頭哀世亂未平也。鄉思復作其聲。嗚嗟相其節奏。又起漢家天子一闕此漢人指法。或疑爲唐七言歌調。非知聲者。

我非貪生而惡死。不能捐身兮心有以。生乃冀得兮歸桑梓。死當埋骨兮長已矣。日居月諸兮在我壘。□人寵

我今有二子。鞠之養之。今不羞耻。愍之念之。今生長邊
鄙。十有一拍兮。因茲起哀響兮。徹心髓。

詩紀乃作仍我作我

序曰。十一拍歌。貪生自言失身在言子。志意益乖焉。
爲下文漢家天子布陽和轉調。自歎自慰。聲情欲絕。
日居月諸。蓋自矢其初志也。

東風應律兮。暖氣多。漢家天子兮。布陽和。卷口踏舞兮。
共謳歌。兩國交驩兮。罷兵戈。忽逢漢使兮。稱近詔。遣千
金兮。贖妾身。喜得生還兮。逢聖君。嗟別二子兮。會無因。
十有二拍兮。哀樂均。去住兩情兮。難具陳。

別本漢家上有知是二字

序曰十二拍歌東風應律喜歸漢也。去住兩情兮難具陳。承上引下之文。咏歎淫佚。

不謂殘生兮却得旋歸。撫抱□兒兮泣下沾衣。漢使迎我兮四牡駢駢。□兒號兮誰得知。與我生死兮逢此時。愁爲子兮日無光輝。焉得羽翼兮將汝歸。一步一遠兮足難移。魂消影絕兮恩愛遺。十有三拍兮絃急調悲。肝腸攪刺兮人莫我知。

序曰十三拍歌得歸別二子也。絕弦高張之調。

身歸國兮兒莫之隨。心懸懸兮長如饑。四時萬物兮有盛衰。唯有愁苦兮不暫移。山高地闊兮見汝無期。更深夜闌兮夢汝來斯。夢中執手兮一喜一悲。覺後痛吾心。

思
兮無休歇時。十有四拍兮涕淚交垂。河水東流兮心是

序曰十四拍歌一喜一悲。日與二子遠矣。水自東流
人日西逝。言其不相及也。小弦切切爲清汎之調。

十五拍兮節調促。氣填胸兮誰識曲。處穹廬兮偶殊俗。
願歸來兮天從欲。再還漢國兮歡心。心有憶兮愁轉深。
日月無私兮曾不炤臨。子母分離兮意難任。同天隔越
兮如商參。生死不相知兮何處尋。

謹按詩紀心下有足字與上韵叶樂府歡心轉韻與
漢叶意較圓警

序曰十五拍歌節調促。文姬喜還故國也。又悲終遠
其子焉。三拍越漢國兮入戎城。此曲再還漢國兮

懽心映帶法也調促而聲則長

十六拍兮思茫茫我與兒兮各一方日東月西兮徒相望
不得相隨兮空斷腸對萱艸兮徒想憂忘彈鳴琴兮
情何傷今別子兮歸故鄉舊怨平兮新怨長泣血仰頭
兮訴蒼蒼生我兮獨罹此殃

序曰十六拍歌舊怨平兮新怨長文姬將入長安自
傷其行與願違焉於前之寵我兮有二子爲足曲也
於後之重得兮入長安又轉調也記曰善歌者上如
抗下如隊殷如貫珠者

十七拍兮心鼻酸關山阻修兮行路難去時懷土兮枝
枯葉乾沙場白首兮刀痕箭瘢風霜凜凜兮春夏寒人

馬餓廋兮骨肉單。豈知重得兮入長安。歎息欲絕兮淚
闌干。

謹按詩紀去時懷土兮思漫漫塞上黃蒿兮校枯葉
乾或琴曲脫誤

序曰十七拍歌闕山歸漢也。人情不甚相遠。或喜極
而悲。非好反也。人之多懷。往往繇於迴憶。真成雅奏。
初奏雲山萬重兮歸路遐。無望之禍也。禍至不疑。
豈知重得兮入長安。無望之福也。福至如幸。琰有士
人之操。范史爲之立傳。固宜。

□笳本自出□中。綠琴翻出音律同。十八拍兮曲雖終。
響有餘兮思未窮。是知絲竹微妙兮均造化之功。哀樂
各隨人心兮有變則通。□與漢兮異域。殊風夫與地隔。

兮子西母東。苦我怨氣兮。浩於長空。六合離兮。受之應不容。

集考琴集。大口。箏十八拍。小口。箏十九拍。並蔡琰作。案蔡翼琴曲。有大口。箏十八拍。沈遠集。世名流家。聲小口。箏。又有契聲一拍。共十九拍。謂之觀家聲。李良翰譜序曰。契者。明會合之至理。殷勤之餘也。李肇國史補曰。唐有董庭蘭。善沈聲。視聲。蓋大小口。箏云。查雍曰。後漢書。載琰歸漢。後感傷亂離。追懷舊憤。作詩二章。世所傳悲憤詩。不載十八拍。且李善引注文。選擇二詩。而不及此曲一語。後人因疑之。或云。董祀諸其辭。又晉書。后妃傳。景獻羊皇后。母蔡氏。邕女也。羊祜傳。祜。蔡邕外孫。景獻皇后。同產弟。祜討吳有功。將進爵。邕以賜舅子蔡襲。詔封襲關內侯。是邕未嘗無嗣曹操痛。邕無嗣。何為乎。或羊皇后之母。與文姬為姊妹行耳。史則稱爲邕女者。何。侯博雅君子。辨之。

序曰。十八拍歌。緣琴。琴寫箏聲。曲一終也。夫人情不能無感。感有哀樂。聲之正變形焉。哀樂之感。惟一本。

傳稱文姬雅擅音律。故能刻微洞渺至此。後人頌劉
商擬作自辯。王元美以中雜唐調。非文姬筆。正同劉
季緒之詆訶爾。

於忽操

於忽乎。不可以爲其又奚爲。離婁之精。夜何有於明。師
曠之耳。豐者亦有爾東。王良之手兮。後車載之。前行險
旣以覆兮。後逐逐其猶來。雖目盼而心駭兮。顧其能之
安施。委繩墨以聽人兮。雖班輪亦奚以爲。

於忽乎。不可以爲其又奚爲。椽櫨桷榱之累重。顧柱小
之奈何。方風雨之晦陰。行者艱而莫休。居者坐而笑歌。
不知壓之忽然兮。其謂安何。

於忽乎不可以爲其又奚爲謂雞斯飛誰得而羈謂豕
斯突何取于縛是皆以食而得之吾於饑而後噫雞兮
豕兮死以是兮

右載樂苑樂府闕

麗德公辭

集考三國史德公居峴山之南未嘗入城府荊州刺史劉表不能屈後移妻子隱鹿門司馬徽清雅有知人之鑑同郡麗德公素有重名徽兄事之德公嘗謂孔明爲卧龍士元爲鳳雛德操爲冰蠶

序曰於忽操刺時也國亂無政君子懼之豈建寧中
陳竇欲倚聞喜侯爲政邪或曰對劉荊州坐譚客語
耳時裴潛亦謂表以西伯自處敗無日矣余嘗誦
子建九詠何世俗之蒙昧繇倒裳而求領引喻之義
符于麗曲

樂府廣序目次

卷之三十

魏一

琴曲

阮瑀琴歌

嵇康琴歌

思親詩

樂府廣序目次

卷之三十終

樂府廣序 卷之三十

浙西止谿園人朱嘉徵論正

魏十二

琴曲

琴歌

魏書。太祖雅聞瑀名。辟之不應。乃逃入山中。太祖使人焚山得瑀。太祖時征長安。大延賓客。怒瑀不與語。使就技人列瑀善解音。能鼓琴。撫絃而歌。爲曲既捷。音聲殊妙。太祖大悅。

奕奕天門開。大魏應期運。青蓋巡九州。在東西人怨。士爲知己死。女爲悅者玩。恩義苟潛暢。他人焉能亂。

樂府阮瑀辭

序曰。琴歌。歌天門。美魏公能得士也。余曰。元瑜僞人。

樂府廣序

卷之三十

琴曲

一

多此一逃。可惜當時人不烈耳。

琴歌

嵇康琴賦曰。余少好音聲。長而翫之。以爲物有盛衰。而此無變。滋味有厭。而此不勌。可以導養神氣。宣和情志。處窮獨而不悶者。莫近于音聲也。拊弦安歌。歌曰。

凌扶搖兮憩瀛洲。要列子兮爲好仇。餐沆瀣兮帶朝霞。眇翩翩兮薄天游。齊萬物兮超自得。委性命兮任去留。激清響以赴會。何絃歌之綢繆。

載昭明文選樂府關 嵇康辭

序曰。琴歌扶搖樂道也。超然自得。莊列度世之言。當不爲世所度。

思親引

奈何愁兮愁無聊恒惻惻兮心若抽愁奈何兮悲思多
情鬱結兮不可化奄失恃兮孤煢煢內自悼兮啼失聲
思報德兮邈已絕感鞠育兮情剝裂嗟母兄兮永潛藏
想形容兮內摧傷感陽春兮思慈親欲一見兮路無因
望南山兮發哀歎感几杖兮涕汎瀾念疇昔兮母兄在
心逸豫兮壽四海忽已逝兮不可追心窮約兮但有悲
上空堂兮廓無依覩遺物兮心崩摧中夜悲兮當告誰
獨收淚兮抱哀戚日遠邁兮思予心戀所生兮淚不禁
慈母沒兮誰與驕顧自憐兮心忉忉訴蒼天兮天不聞
淚如雨兮歎青雲欲弃憂兮尋復來痛殷殷兮不可裁

本集載嵇康辭 樂府闕

序曰。思親詩。傷逝也。不終其孝養焉。凡琴曲。古無其辭。後人譜之。所云其聲傳者。不必具其辭也。此與虞舜思親操同聲。然辭具而聲亦長。

樂府廣序

卷之三十終

男

爾邁謹訂